



SIARAN MEDIA

PERBADANAN PEMBANGUNAN KAMPONG BHARU

MAJLIS PENYERAHAN WATIKAH DAN PELANTIKAN ANGGOTA PERBADANAN DAN MAJLIS PENASIHAT PERBADANAN PEMBANGUNAN KAMPONG BHARU PERKUKUH HALA TUJU PEMBANGUNAN KAMPONG BHARU

KUALA LUMPUR, 13 OGOS 2026 – Seramai 30 individu menerima watikah pelantikan sebagai Anggota Perbadanan dan Majlis Penasihat Perbadanan Pembangunan Kampong Bharu (PKB) bagi sesi 2026/2028 dalam Majlis Penyerahan Watikah Pelantikan Anggota Perbadanan dan Majlis Penasihat Perbadanan Pembangunan Kampong Bharu yang berlangsung di Perbadanan Pembangunan Kampong Bharu hari ini.

Majlis tersebut disempurnakan oleh YB Hannah Yeoh, Menteri di Jabatan Perdana Menteri (Wilayah Persekutuan) yang melibatkan 15 Anggota Perbadanan dan 15 ahli Majlis Penasihat yang akan menjalankan tanggungjawab bagi tempoh dua tahun sehingga 2028.

Komposisi Anggota Perbadanan merangkumi wakil Kerajaan Persekutuan, Datuk Bandar Kuala Lumpur, wakil Kerajaan Negeri Selangor, golongan profesional serta pemilik dan pewaris tanah Kampong Bharu. Sementara itu, Majlis Penasihat terdiri daripada 15 pemilik dan pewaris tanah Kampong Bharu. Pelantikan ini merupakan satu amanah dan tanggungjawab dalam memastikan PKB terus melaksanakan mandat pembangunan Kampong Bharu dengan mengambil kira kepentingan penduduk, pemilik tanah dan pemegang taruh di samping memelihara identiti, sejarah dan warisan Kampong Bharu.

Berteraskan Akta Perbadanan Pembangunan Kampong Bharu 2011 (Akta 733), PKB berperanan sebagai penyelarass, pemudah cara, pengawal selia dan penggerak utama pelaksanaan pembaharuan semula Kampong Bharu. Kini memasuki tahun ke-14 penubuhannya, PKB telah melalui evolusi peranan seiring dengan keperluan dan perkembangan semasa. Dengan kawasan pembangunan yang diwartakan seluas 300.73 ekar, peranan PKB kini turut merangkumi pelaksanaan pembangunan fizikal serta inisiatif sosial dan ekonomi yang memberi impak langsung kepada masyarakat.

Antara inisiatif semasa PKB termasuk pembangunan Dataran Kampong Bharu, penaiktarafan Pusat Komuniti Kampong Bharu, pelaksanaan konsep RE-NEW melalui penggunaan semula bangunan, pemerkasaan ekonomi Melayu serta usaha memperkasa sektor pelancongan dan warisan Kampong Bharu.

Perkembangan ini memperlihatkan evolusi PKB daripada peranan sebagai pemudah cara kepada penggerak pembangunan yang turut menyokong kemajuan fizikal, sosial dan ekonomi Kampong Bharu. Dalam memastikan pembangunan Kampong Bharu dilaksanakan secara teratur dan bersepadu, kerjasama antara PKB, Dewan Bandaraya Kuala Lumpur (DBKL) dan Pejabat Tanah dan Galian Wilayah Persekutuan Kuala Lumpur (PTG WPKL) terus diperkukuh mengikut bidang kuasa dan peranan masing-masing.

Kerjasama strategik ini penting bagi memastikan pembangunan Kampong Bharu dilaksanakan selaras dengan dasar, polisi, garis panduan serta peruntukan undang-undang yang berkuat kuasa tanpa mengabaikan kepentingan penduduk serta nilai sejarah dan warisan Kampong Bharu. Pada masa sama, Anggota Perbadanan dan Majlis Penasihat memainkan peranan penting dalam memperkukuh tatakelola melalui fungsi semak dan imbang terhadap perancangan serta pelaksanaan pembangunan, di samping membantu menyeimbangkan keperluan pembangunan dengan keperluan sosial dan kehendak masyarakat setempat.

Melalui pelantikan ini, PKB akan terus memperkukuh usaha memastikan Kampong Bharu berkembang sebagai kawasan Melayu yang berdaya maju dalam aspek fizikal, sosial dan ekonomi di samping terus memelihara warisan dan budaya Melayu agar kekal unggul, kukuh dan relevan sepanjang zaman.

Disediakan oleh:

**Perbadanan Pembangunan Kampong Bharu
13 Ogos 2026**